

Bertoni

I.

No sap chantar qí son non di,
ni vers trobar [qui motz non fa],
ni no conois rima com va
sí razo non enten en sí;
[mas] lo mieus chantz es enaissi,
con plus l'auzires mas valra.

II.

Nuls hom nos meravill de mi
s'eu am zo qe ia nom veira,
q'el cor ioi d'autr' amor non ha
mas de cella q'ieu hanc non vi;
ni per autre ioi tan non ri,
senes pro qe ia no m'aura.

III.

E sí tan fai de zo devi,
ma donna cossi m'amara,
pos messatgiers lai non ira,
ni eu men metrai el cami?
E s'anc per leis null mal suffri,
ia per mon grat non o sabra.

IV.

Ben sai q'anc de leis non iauzi,
n'ella de mi non iauzira,
ne per zon amic nom tenra,
ni covent nom fara de sí:
anc ver nom diz ni nom menti,
car non cove ni non esca.

V.

Colps de ioi mi fer, qe m'ausi,
e ponha d'amor, qem sostra
la charn, per qel cors magrira;
qe anc mais tant fort nom feri,
ni per autre tant non languí;
non sai qals bes men avenra.

VI.

Anc tan soven no m'adormi,
mos esperitz tost non fos la,

ni tan d'ira non ac de sa,
q'ades ab ioi no fos aqi,
e qan mi reveil al mati
totz mos bos sabers mi trazva.

VII.

Fagz es lo vers, q'anc noi falli,
e tot zo q'i es ben esta;
e cel qi de mi l'apenra,
gart nol frang ni nol penzi
e [vuelh l'auja] en caerci
Bertranz nil Comz lai en Tolza.

VIII.

Bons es lo soms e faran i
qalqe ren don hom chantara.

- letto 493 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/bertoni-0>